

ՀՏԴ 070Ժուռնալիստիկա*Զարինե ՄԱՌԱՋՅԱՆ**ԱրՊՀ գրականության և ժուռնալիստիկայի ամբիոնի դոցենտ, ք.գ.թ.**Մելինե ՄԱՐԳՍՅԱՆ**ԱրՊՀ ասպիրանտ*

«ԱՐՑԱԽԻ ՀԱՄԱԼՍԱՐԱՆ» ԹԵՐԹԻ ԳՈՐԾՈՒՆԵՈՒԹՅՈՒՆԸ 2010-2022 ԹԹ.

Սույն հոդվածը նվիրված է «Արցախի համալսարան» գիտակրթական ամսաթերթին, որը ԱրՊՀ պաշտոնաթերթն է: Այն Արցախի մայր բուհի կյանքի ինքնատիպ տարեգիրն է, որն իրականացնում է տեղեկատվական, կրթական և այլ գործառույթներ՝ ձեռքը մշտապես պահելով խնդիրների ու դրանց լուծման զարկերակին: Թեման արդիական է ու կարևոր, քանի որ մամուլի պատմությունը խոսուն փաստ է ընդդեմ հակահայկական պատմական զեղծարարությունների ու քարոզչության:

Բանալի բառեր՝ Արցախի համալսարան, թերթ, լուսաբանել, տպագիր մամուլ, տեղեկատվություն, Արցախի Հանրապետություն, Արցախի պետական համալսարան:

3.Տարաձյան, Մ.Տարգսյան

ДЕЯТЕЛЬНОСТЬ ГАЗЕТЫ «АРЦАХИ АМАЛСАРАН»

В 2010-2022 гг.

Статья посвящена научно-образовательному ежемесячнику "Арцахский университет", который является официальной газетой АрГУ. Это уникальная летопись жизни Арцахского университета, которая осуществляет информационные, образовательные и другие функции, при этом держа руку на пульсе проблем и их решений. Тема актуальна и важна, так как история прессы является красноречивым фактом против антиармянских исторических фальсификаций и пропаганды.

Ключевые слова: Университет Арцаха, газета, освещение, печатная пресса, информация, Республика Арцах, Арцахский Государственный университет.

Z.Sarajyan, M.Sargsyan**"ARTSAKHI HAMALSARAN" NEWSPAPER ACTIVITIES IN 2010-2022**

The article is devoted to "Artsakhi Hamalsaran" scientific-educational monthly, which is the official newspaper of Artsakh State University. It is a unique record of Artsakh University's life, which carries out informational, educational and other activities while keeping up with current problems and their solutions. The topic is relevant and important, as the history of the press is an eloquent fact against anti-Armenian historical falsifications and propaganda.

Key words: *Artsakhi Hamalsaran, newspaper, highlight, press, information, Republic of Artsakh, Artsakh State University.*

Տեղեկատվական տեխնոլոգիաների սրընթաց զարգացման արդի ժամանակշրջանում տպագիր մամուլը մեդիասպառողի համար երկրորդ պլան է մղվում տեղեկատվության օպերատիվություն ապահովելու տեսանկյունից՝ իր տեղը զիջելով ժամանակակից ՏՏ բազմաբնույթ գործիքներին:

Պետք է նշել սակայն, որ ժամանակակից զարգացումների համատեքստում, հատկապես տեղեկատվական պատերազմների մեջ գտնվող երկրների համար, հույժ կարևորվում է տպագիր մամուլի դերակատարությունն ու տպագիր մամուլի պատմության ուսումնասիրությունը, այն նոր լույսի ներքո մեկնաբանելը, վերաբժնորելը, որպես պատմագիտական փաստարկ ներկայացնելը՝ տասնամյակների ու հարյուրամյակների պատմություն ունեցող թերթերն ու պարբերականները դիտարկելով որպես տվյալ երկրի այս կամ այն ոլորտի ինքնատիպ տարեգիր և փաստերի արձանագրող: Մամուլը դիտարկելով որպես տվյալ երկրի մշակույթի բաղկացուցիչ մաս՝ Արցախի ժուռնալիստների միության նախագահ, լրագրող Կիմ Գաբրիելյանը իրավացիորեն փաստում է. «Արցախում մամուլի ավելի քան 135 տարվա պատմությունը նույնպես փաստում է, որ դարերի ընթացքում հայկական այս երկրամասում, իրոք, ստեղծվել է մշակութային հարուստ ժառանգություն. նկատենք, որ Լեռնային Ղարաբաղում առաջին պարբերականը լույս է տեսել ներկայիս Հայաստանի Հանրապետության տարածքում հրատարակված անդրանիկ պարբերականի լույս ընծայվելուց ընդամենը մի քանի տարի հետո: Սա ևս վկայում է երկու հայկական պետությունների պատմամշակութային նույնարմատ կապի մասին»¹:

Արցախում, մասնավորապես՝ Շուշիում, պարբերականներ հրատարակվել են 19-րդ դարի 70-ական թթ-ից: Որպես անդրանիկ թերթ՝ հիշատակվում է «Հայկական աշխարհ»-ը, որը տպագրվել է 1874 թ-ին²:

¹ Արցախի պարբերական մամուլի պատմությունից (1874-2009թթ.), Արցախի ժուռնալիստների միություն, Ստեփանակերտ, «Դիզակ պլուս» հրատ., 2010թ., էջ 5:

² «Հայաստան» հանրագիտարան, ՀՀ ԳԱԱ, Երևան հրատ., 2012թ., էջ 1015:

Մամուլի պատմությունը դիտարկելով որպես խոսուն փաստ ընդդեմ հակահայկական պատմական գեղծարարությունների ու քարոզչության՝ կարևորվում է Արցախի Հանրապետությունում լույս տեսնող տպագիր մամուլի ուսումնասիրությունը, մասնավորապես՝ «Արցախի համալսարան» թերթի գործունեության, տեղեկատվական, կրթագիտական, մշակութային, համալսարանի թափանցիկության, կրթագիտական կյանքի հանրայնացման, և, առհասարակ, թերթի քաղաքականության առանձնահատկությունների քննությունը՝ ժամանակակից լույսի ներքո:

«Արցախի համալսարան»-ը գիտակրթական ամսաթերթ է, որը հանդիսանում է Արցախի պետական համալսարանի պաշտոնաթերթը: Լույս է տեսնում Ստեփանակերտում, 1997 թ-ի հունվարի կեսերից, սկզբնական շրջանում՝ 500-600 օրինակ տպաքանակով, այժմ՝ տպաքանակի խիստ կրճատմամբ:

«Արցախի համալսարան» թերթի մասին հիշատակում են պատմաբաններ Գևորգ Յազըճյանը, Մհեր Հարությունյանը հայկական պարբերական մամուլին նվիրված իրենց ուսումնասիրություններում, ընդ որում՝ համառոտ տեղեկություններով: Այս առումով սույն հոդվածի **նորույթն** այն է, որ առաջին անգամ փորձ է արվում համապարփակ ուսումնասիրության ենթարկել «Արցախի համալսարան» թերթն ու նրա գործունեությունը ինչպես ընդհանրական բնութագրմամբ, այնպես էլ վերոնշյալ ժամանակային կտրվածքով, ասել է թե՛ քննել համաժամանակյա և տարաժամանակյա տիրույթներում:

Գ. Յազըճյանը նշում է, որ թերթը չի տեսել, այլ նկարագրում է ըստ «Արմենպրես»-ի տարածած տեղեկատվության¹:

«Արցախի պարբերական մամուլի պատմությունից» աշխատության մեջ պատմաբան Մհեր Հարությունյանը նշում է, որ «Արցախի համալսարան»-ը փաստական ժառանգորդն է 1994 թ. փետրվարից լույս տեսած և մի քանի համար հրատարակելուց հետո դադարած «ԼՂՊ համալսարան» թերթի²:

Թերթը տարբեր ժամանակաշրջաններում խմբագրել են Ս. Օհանյանը, Գրիգոր Դանիելյանը, Արտակ Դուլյանը, Արմինե Պետրոսյանը, Լիանա Բաղդասարյանը, Լաուրա Գրիգորյանը, Նարինե Աբրահամյանը, Զարինե Սառաջյանը:

Արցախի պետհամալսարանի պաշտոնական www.asu.am կայքի տեղեկատվությամբ՝ «Արցախի համալսարան» թերթը հրատարակվում է ամիսը մեկ անգամ՝ հայերեն: Թերթի առաջին համարը լույս է տեսել 1993թ. մայիսին: Առաջին խմբագիրն էր Ս. Օհանյանը: Թերթի էջերում տեղ են գտնում համալսարանի դասախոսների և ուսանողների հոդվածները, որոնք

¹ «Ազգ», 21.01.1997թ., «ՀՀ», 21.01.1997թ.:

² Արցախի պարբերական մամուլի պատմությունից (1874-2009թթ.), Արցախի ժուռնալիստների միություն, Ստեփանակերտ, «Դիզակ պյուն» հրատ., 2010թ., էջ 88:

արտացոլում են գիտական, կրթական և ուսանողական կյանքի բազմաբնույթ հարցեր¹։ Կայքի «Հրապարակումներ» բաժնի «Թերթ «Արցախի համալսարան»» ենթաբաժնում տեղադրվում են թերթի էլեկտրոնային տարբերակները՝ 2013 թ. մի քանի համար և 2016 թ.-ից առ այսօր հրատարակված բոլոր համարները²։

Ուսումնասիրելով թերթի 2010-2022 թթ-ի, ինչպես նաև նշյալ ժամանակահատվածին նախորդող շրջանում տպագրված համարները՝ կարող ենք արձանագրել, որ թերթն ընդհանուր առմամբ հանդիսանում է համալսարանի որդեգրած քաղաքականության խոսափողը և հարթակ ինչպես բարձրագույն կրթության ոլորտի ծրագրերի իրացման, տարաբնույթ միջոցառումների արձանագրման, այնպես էլ մտավորականության և ուսանողության ուշագրավ գաղափարների, մտքերի հանրայնացման։

Արցախի պետական համալսարանը ոչ միայն Արցախի Հանրապետության գիտակրթական խոշորագույն կենտրոնն է, այլ նաև մշակութային, հայագիտական, ազգային ու համամարդկային արժեքները պահպանող, սերունդների մեջ ամրապնդող, գաղափարներ գեներացնող հաստատություն։ Թերթի էջերում պարբերաբար տեղ են գտել տարբեր ժանրերով հոդվածներ, համալսարանի գիտակրթական կյանքը լուսաբանող նյութեր՝ հարցազրույց, ակնարկ, դիմանկարային ակնարկ, լրատվական, իրադարձային, գիտության տարբեր բնագավառներին վերաբերող գիտաճանաչողական հոդվածներ, հավերժի ճամփորդ դարձած, ինչպես նաև ապրող հերոսներին նվիրված նյութեր, գրական-գեղարվեստական ժանրի ստեղծագործություններ՝ պատմվածքներ, բանաստեղծություններ, էսսեներ և այլն։

Պետական բարձրաստիճան պաշտոնյաների հետ համալսարանականների հանդիպումները լուսաբանող հոդվածների ուսումնասիրությունից ակնհայտ է դառնում, որ Արցախի պետական համալսարանը միշտ էլ առանցքային դեր ու նշանակություն է ունեցել երկրի ղեկավարության համար՝ կրթության և գիտության ոլորտում իրականացվող ծրագրերում կարևորելով համալսարանի ներուժը. այսպես՝ «Մայր բուհը պետք է լինի ոչ միայն կրթական, այլև գիտական կենտրոն»³ վերտառությամբ հոդվածում լուսաբանվում է 2009 թ. հունվարի 16-ին ԱրՊՀ նոր ձևավորված խորհրդի նիստը, որին ներկա էին նաև ԱՀ նախագահ Բակո Սահակյանը, վարչապետ Արայիկ Հարությունյանը, պաշտոնատար այլ անձինք։

Նիստի աշխատանքների լուսաբանման համատեքստում, որպես առանցքային միտք, նշվում է, որ Արցախի մայր բուհից երկրի ղեկավարությունը մեծ ակնկալիքներ ունի և մեջբերվում է ԱՀ նախագահի խոսքը. «Համալսարանը պետք է լինի հանրապետության ոչ միայն կրթական, այլև հիմնական գիտական

¹ http://www.asu.am/index.php?option=com_content&view=article&id=95

² Նույն տեղում։

³ «Արցախի համալսարան», 1(116), հունվար, 2009, էջ 1։

կենտրոններից մեկը... Անձամբ հետևելու եմ այս ոլորտում իրականացվող բարեփոխումների ընթացքին: Համոզված եմ, որ մեզ կհաջողվի ունենալ ժամանակակից, մրցունակ, գիտակրթական համակարգ և մեծ համբավ ունեցող մայր բուհ»¹:

Հաջորդիվ լույս տեսած համարներում տարբեր ձևաչափերով իրականացված միջոցառումների լուսաբանմամբ թերթը ներկայացնում է երկրի ղեկավարության որդեգրած՝ բարձրագույն կրթության ոլորտում բարեփոխումների և կրթագիտական բնագավառի շարունակական բարելավմանն ուղղված քաղաքականության արտացոլումը:

2010 թ. անդրանիկ համարը բացվում է «Ուսման որակի բարձրացումը՝ կարևորագույն պայման»² վերտառությամբ ԱրՊՀ խորհրդի հերթական նիստը լուսաբանող հոդվածով: Նիստը նախագահում էր այդ տարիների խորհրդի նախագահ, ԼՂՀ վարչապետ Արայիկ Հարությունյանը, ով նիստի աշխատանքներն ամփոփող իր խոսքում զարգացած երկիր ունենալու համար ընդգծում է բարձրորակ կրթություն ունենալու նախապայմանը, իսկ կրթական բարեփոխումների հարցում՝ միակ ճիշտ ուղին համարում եվրոպական կրթական համակարգի մոդելն ու Արցախի կրթական համակարգի ինտեգրվելը վերջինիս: Թերթը վերոնշյալ հոդվածում մեջբերում է երկրի վարչապետի խոսքը, որը ուղենիշային նշանակություն ունի ինչպես կրթական քաղաքականության, այնպեսև, դրանից ածանցվող, թերթի տեղեկատվական քաղաքականության հարցում. ««Եթե մենք ուզում ենք ունենալ զարգացած երկիր, առաջին հերթին պետք է ունենանք զարգացած կրթական համակարգ», - ասաց Ա. Հարությունյանը: Այս առումով նա կարևորեց ժամանակակից պահանջներին համապատասխանող մասնագետների պատրաստումը, ինչը ենթադրում է ուսման որակի հետևողական բարձրացում», - խորհրդի նախագահի խոսքը թերթում եզրափակվում է երկրի համար անհրաժեշտ մասնագետներ պատրաստելու գործը որակական նոր մակարդակի բարձրացնելու անհրաժեշտության պահանջով:

Աշխատաշուկայի պահանջներին բավարարող որակյալ մասնագետներ պատրաստելուն ուղղված երկրի ղեկավարության պահանջն ու այդ ուղղությամբ գործադրած բուհի ղեկավարության և համապատասխան կառույցների ջանքերը տեսանելի են նաև թերթի հաջորդ տարիների համարներում, որոնցով սկսվում է յուրաքանչյուր տարվա թերթի անդրանիկ համարը՝ ԱրՊՀ խորհրդի ղեկավարի նախագահությամբ (տարբեր ժամանակաշրջաններում՝ ԼՂՀ վարչապետը, ապա՝ ԱՀ պետնախարարը) կայացած խորհրդի նիստերի լուսաբանմամբ: Ահավասիկ՝ «Որակյալ

¹ Նույն տեղում:

² «Արցախի համալսարան», 1(126), հունվար, 2010թ., էջ 1:

մասնագետներ պատրաստելով կկարողանանք դիմակայել փորձություններին»¹ վերնագրով հոդվածը, որը պատմում է տարվա ընթացքում բուհում կատարված աշխատանքների մասին ռեկտորի հաշվետվության, առկա խնդիրների բարձրաձայնման և դրանց լուծման ուղիների շուրջ առաջարկությունների մշակման ու ներկայացման մասին:

Գիտական տարբեր կենտրոնների (այդ թվում նաև՝ հայագիտական, ազգագրական), հիմնում, միջազգային գիտաժողովների կազմակերպում, աշխարհահռչակ անվանի գիտնականների հյուրընկալում, արտերկրի և ՀՀ առաջատար բուհերի, գիտական ինստիտուտների, կազմակերպությունների միջև համագործակցային կապերի ստեղծում և ամրապնդում, համատեղ ծրագրերի իրականացում և փոխայցելություններ. թերթի՝ մեր կողմից ուսումնասիրված համարներում արձանագրված այս և նմանատիպ միջոցառումները միտված էին մի կողմից Արցախի մայր բուհում կրթության և գիտության զարգացմանը, որակի բարելավմանը, մյուս կողմից՝ կրթության և գիտության միջոցով Արցախի ճանաչելիությանը միջազգային հանրության կողմից, Արցախի հիմնախնդրի լուծմանը նպաստ ունենալը:

Խոսելով «Արցախի համալսարան» թերթի գործառույթների մասին՝ պետք է առանձնանշել նրա՝ տեղեկատվական, մշակութալուսավորչական, կրթական, սոցիալ-դաստիարակչական և այլ գործառույթները, ինչպես նաև՝ որպես երկրի մայր բուհի հիմնական ու մնայուն տարեգիրը լինելու գործառույթը, որին չի սպառնում հաքերային ու ցանցային տարաբնույթ տեղեկատվական հարձակումները՝ ի տարբերություն ժամանակակից ինֆորմացիոն կրիչների, այդ թվում նաև՝ բուհի պաշտոնական կայքի ու սոցիալական մեդիայի:

Թերթի բոլոր համարներում առանձին տեղ է հատկացված հիշարժան օրերի առթիվ հղված ռեկտորի ուղերձներին, ԱրՊՀ մեծ խորհրդի և գիտխորհրդի նիստերի լուսաբանմանը, համալսարանի տարբեր բնագավառներում, այդ թվում՝ գիտության և միջազգային համագործակցության, ուսումնական աշխատանքների, ուսանողների, շրջանավարտների, հասարակայնության հետ տարվող աշխատանքների, վարչատնտեսական ուղղությամբ իրականացվող գործընթացների լուսաբանմանը: Թերթի համարներում մինչև 2016 թ. տպագրվում էին նաև դասախոսների և ուսանողների հեղինակային հոդվածները, սակայն 2016-ից հետո, թերթի ծավալի հետ կապված փոփոխություններով՝ պայմանավորված, փոխվեց նաև թերթի քաղաքականությունը՝ հիմնականում տեղ տալով 2016 թ. համալսարանում ստեղծված լրատվության և հանրային կապերի բաժնի պատրաստած նյութերին, իսկ հեղինակային նյութերի համար որպես հարթակ տրամադրելով բուհի պաշտոնական կայքը և գիտական տեղեկագիրը: Իսկ ուսանողության համար հիմնադրվեց ուսանողական «Քո ժամանակը» թերթը, որը դարձավ

¹ «Արցախի համալսարան», 1(148), հունվար, 2012թ., էջ 1:

ստեղծագործող և լրագրության ոլորտում իրենց առաջին քայլերն անող ուսանողների համար ինքնադրսևորման հարթակ:

Արցախի պետական համալսարանի «Քո ժամանակը» ուսանողական ամսաթերթը հրատարակվում է 2014թ-ից: Թերթի էջերում տեղ են գտնում համալսարանի ուսանողների հոդվածներ, բանաստեղծություններ և այլ նյութեր, որոնք արտացոլում են կրթական և ուսանողական կյանքի բազմաբնույթ հարցեր, խնդիրներ ու ձեռքբերումներ: Թերթի համարների էլեկտրոնային տարբերակները հասանելի են Արցախի պետական համալսարանի պաշտոնական կայքի «Հրապարակումներ» բաժնի «Թերթ «Քո ժամանակը»» ենթաբաժնում¹:

Արցախի մայր բուհի պաշտոնաթերթը ինչպես իր հիմնադրման պահից, այնպես մեր ուսումնասիրության շրջափուլում, հանդես է գալիս որպես Արցախի Հանրապետությունում տեղի ունեցող կարևորագույն իրադարձությունների մասնակից՝ կրթագիտական կայնքից գատ, անդրադառնալով նաև երկրի համար հրատապ թեմաներին, խնդիրներին, այդ թվում նաև՝ քաղաքական և այլ, արտահայտում առաջարկություններ, տեսակետներ՝ որպես երկրի առաջատար բուհ:

Ահավասիկ. «Արցախի համալսարան» թերթի 2016 թ. սեպտեմբեր ամսվա համարում «ԼՂՀ-ն զիջելու տարածքներ չունի» վերտառությամբ հոդվածը պատմում է ՌԴ քաղաքական վերլուծաբաններ Սողեստ Կոլերովի և Ստանիսլավ Տարասովի ԱրՊՀ կատարած այցի մասին, որը Ղարաբաղյան խնդրի կարգավորման ուղիների շուրջ հանրային կարծիքի ուսումնասիրության նպատակ էր հետապնդում: Ըստ թերթի. «Հանդիպման երկրորդ մասում քաղաքագետները ներկաներից հետաքրքրվեցին, թե ինչպես են պատկերացնում ղարաբաղյան հարցի կարգավորումը, ինչպիսի ակնկալիքներ ունեն և խնդրի խաղաղ կարգավորման համար ինչ փոխզիջումների են պատրաստ: Վերջին հարցի պատասխանը միանշանակ էր՝ փոխզիջում ասվածը հարաբերական է. ԼՂՀ-ն զիջելու տարածքներ չունի», -ընդհանրացնում է թերթը հանդիպմանը ներկա համալսարանականների կարծիքը²:

Թերթի մեր ուսումնասիրության ժամանակահատվածն աչքի է ընկնում ինչպես Արցախի Հանրապետության զարգացման համար համեմատաբար կայուն ու խաղաղ ժամանակաշրջանով, այնպես էլ երկրի համար բարդ ու ողբերգական, անդառնալի կորուստներով լի ժամանակաշրջանով: Եթե մինչև 2016 թ. թերթը արձանագրում է բուհի կայուն զարգացման ուղին, ապա 2016-ի ապրիլյան պատերազմը խաթարում է այդ խաղաղ կենսագործունեությունը: Թերթի էջերում արձանագրվում են հանուն հայրենյաց պատերազմում անմահացած ուսանողների հերոսապատումները, պատերազմական օրերին՝

¹ http://www.asu.am/index.php?option=com_content&view=article&id=2213

² «Արցախի համալսարան», 06(193), սեպտեմբեր, 2016, էջ 5:

աղջիկների թիվունքային աշխատանքները: Պատերազմական ու հերոսացման տարեգրությունը կրկին սկսվում է 2020 թ. սեպտեմբերի 27-ի պատերազմով: Հարկ է նշել, որ պատերազմական օրերին հասկանալի պատճառներով թերթը չէր տպագրվում: 2020 թ. դեկտեմբերի 1-ից բուհում պարապմունքների մեկնարկին զուգընթաց թերթը սկսեց տպագրվել՝ պատերազմից հետո առաջին համարը նվիրելով հանուն հայրենիքի անմահացած 26 լույս տղաների՝ հիշատակին՝ ներկայացնելով նրանց կենսապատում-հերոսացումը՝ լուսանկարներով¹:

Համալսարանական կյանքի կրթական ոլորտում արձանագրված աննախադեպ հաջողությունը ՀՀ Մասնագիտական կրթության ՈԱԱԿ-ի կողմից Արցախի պետական համալսարանի ինստիտուցիոնալ հավատարմագրումն էր թերթի նշյալ ժամանակահատվածի ուսումնասիրությունների ծիրում: Թերթը գործընթացի լուսաբանմանն անդրադառնալ սկսել է դեռևս մինչև 2020 թ. պատերազմը:

2018 թ. դեկտեմբեր ամսվա համարում «Աշխատաժողով «Որակի ապահովման համակարգ: Ինստիտուցիոնալ հավատարմագրում» թեմայով» վերտառությամբ հոդվածում նշվում է, որ ԱՀ Կառավարության որոշմամբ Արցախի բոլոր պետական և ոչ պետական բուհերը պետք է անցնեն հավատարմագրում անկախ կառույցի կողմից և մինչև 2019 թ. դեկտեմբերի 30-ը պետք է դիմեն հավատարմագրման, այլապես՝ բուհերը կկորցնեն լիցենզիան»², -նշում է թերթը՝ հավելելով, որ հավատարմագրումը հաջողությամբ անցնելը որակի առկայության ցուցիչ է:

ՀՀ Մասնագիտական կրթության ՈԱԱԿ կողմից կազմակերպված վերապատրաստման դասընթացների, ՈԱԱԿ և ԱրՊՀ մասնագետների փոխայցելությունների, հավատարմագրմանը միտված միջոցառումների մասին թերթը արձանագրում է նաև 2019 թ. հունվար-փետրվար ամիսների հրատարակությունում³ և հաջորդիվ՝ մինչև հավատարմագրումը:

Համալսարանի պատմության ընթացքում աննախադեպ իրադարձությունը՝ բուհի հավատարմագրումը, թերթը արձանագրում է 2021 թ. հոկտեմբեր ամսվա համարում. «Հոկտեմբերի 22-ին տեղի ունեցավ «Մասնագիտական կրթության որակի ապահովման ազգային կենտրոն» հիմնադրամի (ՈԱԱԿ) Հավատարմագրման հանձնաժողովի նիստ: Օրակարգում Արցախի պետական համալսարանի ինստիտուցիոնալ հավատարմագրումն էր: Հավատարմագրման հանձնաժողովը քննարկեց փորձագետների զեկույցները հաստատությունների ինստիտուցիոնալ կարողությունների վերաբերյալ, դիտարկեց դրական և բացասական գնահատված տիրույթները, փորձագետների մատնանշած ուժեղ և

¹ Նույն տեղում, 05 (228), հոկտեմբեր-դեկտեմբեր, 2020:

² Նույն տեղում, 09 (214), դեկտեմբեր, 2018, էջ 2:

³ Նույն տեղում, 1 (215), հունվար-փետրվար, 2019, էջ 7:

թույլ կողմերը, հնարավոր ռիսկերը: Քննարկվեց նաև, թե որքանով են իրատեսական բուհի բարելավման ծրագրերը:

Հավատարմագրման հանձնաժողովի որոշմամբ՝ Արցախի պետական համալսարանին շնորհվեց ինստիտուցիոնալ հավատարմագրում՝ 4 տարի ժամկետով¹:

Այսպիսով՝ «Արցախի համալսարան» թերթը, լինելով Արցախի մայր բուհի պաշտոնաթերթը, հանդիսանում է երկրի կարևորագույն հաստատության՝ մայր բուհի կյանքի ինքնատիպ տարեգիրը՝ իրականացնելով տեղեկատվական, մշակութալուսավորչական, կրթական, սոցիալ-դաստիարակչական և այլ գործառնություններ՝ միաժամանակ նաև ձեռքը մշտապես պահելով երկրի ու բուհի առջև ծառացած խնդիրների ու դրանց լուծման զարկերակին:

Գրականություն

1. Արցախի պարբերական մամուլի պատմությունից (1874-2009թթ.), Արցախի ժուռնալիստների միություն, Ստեփանակերտ, «Դիզակ պլուս» հրատ., 2010թ.
2. «Հայաստան» հանրագիտարան, ՀՀ ԳԱԱ, Երևան հրատ., 2012թ.

Թերթեր

1. «Ազգ», 21.01.1997թ., «ՀՀ», 21.01.1997թ.
2. «Արցախի համալսարան», 1(116), հունվար, 2009թ.
3. «Արցախի համալսարան», 1(126), հունվար, 2010թ.
4. «Արցախի համալսարան», 1(148), հունվար, 2012թ.
5. «Արցախի համալսարան», 06(193), սեպտեմբեր, 2016թ.
6. «Արցախի համալսարան», 05 (228), հոկտեմբեր-դեկտեմբեր, 2020թ.
7. «Արցախի համալսարան», 09 (214), դեկտեմբեր, 2018թ.
8. «Արցախի համալսարան», 1 (215), հունվար-փետրվար, 2019թ.
9. «Արցախի համալսարան», 07 (235), հոկտեմբեր, 2021թ.

Էլեկտրոնային ռեսուրսներ

6. www.asu.am

Հոդվածը տպագրության է երաշխավորել խմբագրական խորհրդի անդամ, բ.գ.դ. Ս.Ա.Խանյանը:

¹ Նույն տեղում, 07 (235), հոկտեմբեր, 2021, էջ 1: